

starogradski

OPĆINA STARI GRAD
SARAJEVO



MUNICIPALITY OF STARI
GRAD SARAJEVO

haber

BESPLATAN PRIMJERAK • JUNI, 2018. broj 38.



Sretno, maturanti!

- 2-5 Obilježavanje Dana Općine
- 6 Općinsko vijeće
- 7-8 Projekti
- 9 Obrazovanje
- 10-12 Infrastruktura
- 13 Privreda
- 16-17 Sport
- 18 Predstavljamo



Impressum

- Izdavač:** Općina Stari Grad Sarajevo
- Tiraž:** 2.000
- Pripremili:** Almedina Porča
Alma Imamović
Jasenko Jašarević
Nedim Šahović
- DTP:** Safet Mališević
- Fotografije:** Safet Mališević
Nedim Šahović
- Štampa:** "Pentagram" d.o.o.
- Adresa:** Zelenih beretki br. 4
71000 Sarajevo
- web:** www.starigrad.ba
- e-mail:** info@starigrad.ba
- Telefon:** +387 33 282 385



Obilježavanje

Brojnim sadržajima obilježen Dan Općine Stari Grad

Program trajao od 02-18.maja, uz sadržaje za sve generacije i kategorije stanovništva ● Dodijeljena priznanja i povelje najzaslužnijim pojedincima i udruženjima ● Izleti za penzionere i posjeta stogodišnjacima ● Festival košarke, šahovski turnir, tavlja turnir...

Dan Općine Stari Grad Sarajevo

Tradicionalnom posjetom mezaru Isa bega Ishakovića u haremu Careve džamije, a potom turbetu Gazi Husrev-bega, te Šehidskom mezarju Kovači, obilježen je 02. maj Dan Općine Stari Grad. Na taj dan prije 26 godina, vodile su se presudne bitke za odbranu Starog Grada, ali i cijelog Sarajeva, što su i istakli svi koji su učestvovali u obilježavanju ovog značajnog datuma. Delegaciju, koju su predvodili načelnik Ibrahim Hadžibajrić i predsjedavajući Općinskog vijeća Stari Grad Jusuf Pušina, činili su brojni vijećnici, te pomoćnici, rukovodioci i uposlenici općinskih službi.

Svečana sjednica Općinskog vijeća u Gazi Husrev-begovoj biblioteci

U četvrtak 03. maja u prepunoj Velikoj sali Gazi Husrev-begove biblioteke održana je Svečana sjednica Općinskog vijeća Stari Grad. Manifestacija je iskorištena za dodjelu priznanja najzaslužnijim pojedincima i kolektivima. Pored predstavnika raznih nivoa vlasti, diplomatskog kora, društvenog i političkog života, sjednici su prisustvovala i delegacije pobratimskih općina i gradova iz regije i Turske.

Vrlo brzo nakon Svečane sjed-



Na Šehidskom mezarju Kovači



Dobitnici Općinskih priznanja i povelja

nice Općinskog vijeća, u Balkanskom mevlvijsko-istraživačkom centru na Kovačima otvorena je izložba ručno rađenih umjetnina polaznica Kulturno-edukacionog centra „Konya-Sarajevo“. Izložbu su otvorili načelnik Općine Stari Grad Ibrahim Hadžibajrić i pomoćnik načelnika pobratimske Općine Selçuklu Konya, Ayhan Gürbüz, a trajala je do 12. maja.

4. Međunarodni festival dječije umjetnosti FEDU od 03. do 06. maja

Od samog početka i nastajanja festivala FEDU, Općina Stari Grad je pokazala opredjeljenje za njegovu podršku i afirmaciju, a tako je bilo i ove godine. Festival je bio spoj igre, pozorišnih predstava, edukacije, obrazovanja, muzike



Sa izložbe "Umjetnost bosanske musandere"

ali i ostalih vrijednosti, a za cilj je imao afirmaciju dječijeg stvaralaštva. Najbolju predstavu su izveli gosti iz Kragujevca, predstava je nosila naziv „Princezin rođendan“, a gledaocima su se, pored domaćih izvođača, predstavila i pozorišta iz Hrvatske i Srbije. FEDU je svečano otvoren u Narodnom pozorištu, a zatvoren dodjelom nagrada u Bosanskom kulturnom centru.

Koncerti KUD-a Bašćaršija i OMŠ „Mladen Pozajić“

U Domu Oružanih snaga BiH održana su dva svečana koncerta povodom Dana Općine Stari Grad. Prvi su održali članovi Kulturno-umjetničkog društva „Bašćaršija“, 05. maja, a drugi polaznici Osnovne muzičke škole „Mladen Pozajić“ 11. maja. Oba koncerta su zabilježila jako dobru posjećenost.



Svečani koncert OMŠ "Mladen Pozajić"

Dobitnici priznanja

Općinsku povelju sa zlatnim štitom za požrtvovano djelovanje, naročito u organizovanju i izvođenju odbrane na području općine ove godine dobili su Safet Šehović, Faruk Jašarević i porodica Omerspahić. Povelja sa grbom Općine Stari Grad za izuzetan doprinos u izgradnji i jačanju institucija lokalne zajednice dodijeljena je Halimi Hadžijamaković. Povelja sa grbom Općine Stari Grad za izuzetan doprinos u očuvanju i njegovanju prirodnog i kulturno-historijskog naslijeđa dodijeljena je Adnanu Jusiću i Udruženju Promokultura – Art kuća sevdaha. Priznanje „Policajac godine“ dobio je Nermin Kadrić. Zahvalnice su dodijeljene Nedimu Ramiću – Ekići, Emini Ačkar i Aganu Hodžiću.

4. Međunarodna konferencija „Sarajevo i svijet“ od 04. do 15. maja

Vrlo bitan dio programa obilježavanja Dana Općine Stari Grad činila je 4. Međunarodna konferencija „Sarajevo i svijet“ u organizaciji Međunarodnog foruma Bosna. Konferencijski dio je održan u Velikoj sali Općine Stari Grad i

Obilježavanje

Hedije za boračku populaciju

U amfiteatru Memorijalnog centra Kovači, 02.maja je upriličena podjela hedija članovima porodica šehida i palih boraca, RVI i demobilisanim borcima. Hedije u iznosu od po 100 KM je dobilo 250 pripadnika navedenih kategorija. Uz postrojanje zastava Armije RBiH od strane veterana Armije RBiH i članova Udruženja maloljetnih boraca Armije RBiH općina Centar i Stari Grad Sarajevo, prisutne su pozdravili općinski načelnik Ibrahim Hadžibajrić i predsjedavajući Općinskog vijeća Stari Grad Jusuf Pušina.

tu je javnosti bilo predstavljeno šest programa, uključujući i muzički koncert, a otvorena je i izložba „Umjetnost bosanske musandere“ u Umjetničkoj galeriji BiH. Na konferencijama su učestvovali cijenjeni akademici, pisci, filozofi i profesori iz zemlje i svijeta, a bavili su se bitnim pitanjima kulture, politike, ekonomije u vidiku Sarajeva i odnosa sa ostatkom svijeta.

Posjeta starogradskim stogodišnjakinjama

Ajku Lokmić, stanovnicu Sumbuluše koja je 04. maja napunila 104 godine posjetio je načelnik Općine Stari Grad Sarajevo Ibrahim Hadžibajrić, dok su predsjedavajući Općinskog vijeća Stari Grad Jusuf Pušina i njegov zamjenik Sanel Dragolovčanin na Sedreniku posjetili Azizu Karić, koja je nedavno napunila 103 godine. Njih dvije nezvanično su najstarije stanovnice općine Stari Grad. Nana Ajka je siročić iz Prvog svjetskog rata koje su u Sarajevo rođaci doveli kada su joj bile četiri godine, a već 100 godina



Najvitalnija penzionerka i penzioner



Ssa podijele hedija boračkoj populaciji

živi u ulici Mejlijina, na Kovačima - u staroj bosanskoj kući. Ima četvero djece, sedmero unučadi i jedno praunuče. Ostala je bez muža 1984. godine, ali bez obzira na težak život, uvijek je voljela dobro druženje i pjesmu.

Nana Aziza je nedavno napunila 103. godine, a u Starom Gradu živi već 31. godinu. Rodom je iz okoline Sokoca, ima tri ćerke i dva sina, koja su nažalost preminula. I u ovoj dubokoj starosti zdravlje je dosta dobro služi. Iako ima problema sa sluhom, nana Aziza može nazvati ćerke telefonom, a redovno klanja, čita Kur'an i



Hadžibajrić sa Ajkom Lokmić

Izlet penzionera na Trebević

U saradnji sa Udruženjem penzionera Stari Grad i Centrom za promociju i unapređenje zdravlja, Općina Stari Grad je 12. maja za oko 200 starogradskih penzionera organizovala druženje na Trebeviću uz prevoz, muziku, roštilj i grupne terapijske vježbe. Penzionere je tog dana obišao i općinski načelnik Ibrahim Hadžibajrić koji je dodijelio lente i prigodne poklone najvitalnijem penzioneru i penzionerki.

posti Ramazan. Posjete su upriličene povodom Dana Općine.

Sportski sadržaji

Sportski dio programa obilježavanja Dana Općine Stari Grad počeo je 04. maja Festivalom košarke u Štrosmajerovoj ulici u sru Starog Grada. Po uzoru na velike evropske metropole, Košarkaški klub BBY i Općina Stari Grad su organizovali mini turnir na otvorenom za mlade košarkaše iz svih šest osnovnih škola iz Starog Grada. Potom su podijeljene nagrade pobjednicima Košarkaške lige osnovaca Starog Grada za sezonu 2017/2018.

Održan je i Šahovski turnir Stari Grad (05. maj), Tavla turnir (12. maj), te svečanost (10. maj) povodom završetka sportske sezone osnovaca za 2017/2018. U Centru za mali fudbal Bentbaša odlikovani su najbolji stonoteniseri, odbojkašice, šahisti i fudbaleri Starog Grada.

I ove godine nisu izostali tradicionalni sadržaji povodom Dana Općine Stari Grad, a to je priredba „Djeca na dar Općini“ (09. maj) i posjeta ratnom spomeniku „Tunel D-B“ (08. maj) za učenike IX-ih razreda svih starogradskih osnovnih škola.

Obilježavanjem godišnjice postrojanja Prve policijske brigade Stari Grad, u petak 18. maja na Trgu oslobođenja Alija Izetbegović, uspješno je završen izuzetno bogat program obilježavanja Dana Općine Stari Grad za 2018. godinu.

Općina poklonila najmlađima "Dan dječije radosti"

Druženje mališana u Štrosmajerovoj ulici povodom Dana Općine • Košarka se vratila Starom Gradu

Štrosmajerova ulica, jedna od centralnih gradskih šetnica, postala je na nekoliko sati poligon za dječiju igru, zabavu i sportske aktivnosti. Povodom obilježavanja Dana Općine Stari Grad, u ovoj ulici održan je Festival košarke na kojem su se takmičili starogradski osnovci, kao i zabava za najmlađe uz mađioničare, animatora, maskote, face painting, edukativne radionice...

Vesele ekipe košarkaša prodefilovale su od Gradske tržnice, Ferhadijom, do Štrosmajerove ulice gdje su se tokom cijelog dana odigravale utakmice. Festival košarke organizovali su Košarkaški klub BBY i Općina Stari Grad Sarajevo. Utakmice odigrane u Štrosmajerovoj ulici pokazale se koliko je starogradskih osnivača zaljubljenika u ovaj sport, te koliko su talentovani i puni takmičarskog duha.

„Festival košarke u Starom Gradu je vrhunac naše zajedničke pozitivne košarkaške priče. Košarka se vraća Starom Gradu, a Stari Grad košarci. Djeca vole sport. Košarku vole dječaci i djevojčice, vole da se igraju. Za nas je ovo jedna velika satisfakcija da nastavimo ovim putem,“ izjavio je Admir Sakoč direktor Košarkaškog kluba BBY.



Mališani se okušali u sumo hrvanju

Najveće interesovanje za teren za sumo hrvače

A, oni nešto mlađi, uzrasta do šest godina počeli su se okupljati u Štrosmajerovoj ulici već od 14,00 sati nestrpljivo čekajući da zabava počne. Dok su se jedni družili sa omiljenim maskotama Spidermana, Hulka, Else, Ane, Olafa, Mickey i Minnie Mouse, drugi su se odlučili za popularni face paint-

ing i izradu velikih balona od posebne tekućine. Najviše pažnje privukao je teren za sumo hrvače gdje su se najhrabriji dječaci i djevojčice okušali u hrvanju odjeveni u posebna odijela. Oni najmlađi najviše su bili privučeni stolovima sa priborom za crtanje gdje su se okušali u oslikavanju znamenitosti Starog Grada. Na kraju je za sve njih održana zabava sa mađioničarem.

Predstavnici općinske Službe za obrazovanje, kulturu i sport su najboljim košarkaškim ekipama podijelili pehare i medalje, a mališanima prigodne knjige i slikovnice.

Općinski načelnik Ibrahim Hadžibajrić je uputio čestitke najboljim ekipama, te izrazio zadovoljstvo što najmlađi stanovnici ove općine pokazuju talenat i ljubav prema sportu. „Željeli smo da Dan Općine približimo i onim najmlađim, pa smo osmislili sadržaje za sve uzraste. Zaista je lijepo vidjeti ovako našu djecu i vjerujem da je naš zadatak usmjeravati ih od malih nogu prema sportu i pravim vrijednostima. Nadam se da su među njima budući uspješni sportisti, inženjeri, ljekari i da će jednog dana biti ponos naše općine,“ kazao je Hadžibajrić.



Radionice za najmlađe



Pobjednička torta

Općinsko vijeće

17. sjednica Općinskog vijeća

Općinsko vijeće Stari Grad usvojilo je na sjednici zaključak kojim od Vlade Kantona Sarajevo zahtijeva da zbog neredovnosti i neodržavanja minibuskih linija u Starom Gradu izvrši brisanje preduzeća Gras sa postojećih linija, da te linije odobri i registruje na Centrottrans, da omogući jedinstveni tarifni i saobraćajni sistem uz korištenje jedne karte za svaki prevoz, subvencionira sve korisnike prevoza koji na to imaju pravo, te da se o ovim zahtjevima izjasni najkasnije do 10.maja, ove go-



Omogućiti jedinstveni i saobraćajni sistem

dine. Istovremeno, Općinsko vijeće Stari Grad stavilo je van snage zaključak donesen prije nekoliko mjeseci kojim se odobravaju sredstva u iznosu od 700.000 KM preduzeću Gras za nabavku novih vozila koja bi saobraćala u padinskim dijelovima Starog Grada.

Na sjednici se prisutnima obratio direktor preduzeća Centrottrans Safudin Čengić koji je prezentirao rad Centrottransa, te se osvrnuo na učinak dvije linije koje je Centrottrans uspostavio u Starom Gradu 30.marta – Faletići i Mahmutovac.

“Centrottrans je spreman materijalnim sredstvima, ljudskim potencijalima i iskustvom vršiti održavanje linija u Starom Gradu i obezbijediti javni prevoz dostojan građana, poput onoga u većim gradovima Evrope. Mi trenutno održavamo linije za Širokaču, Mahmutovac i Faletiće. Na ove posljednje dvije smo za 24 dana prevezli 17.000 putnika,”kazao je Čengić.

Od ostalih tačaka koje su se našle na dnevnom redu sjednice Općinskog vijeća Stari Grad, usvojen je izvještaj o izvršenju budžeta za prva tri mjeseca ove godine, te prijedlog o izmjenama i dopunama budžeta za 2018. godinu. Vijeće je prihvatilo prijedloge o dodjeli priznanja Općine Stari Grad Sarajevo za 2018. godinu, uz usvajanje inicijativa za dodjelu tri zahvalnice: Ramić Nedimu-Ekici, Ačkar Emini i Aganu Hodžiću. Također je usvojen i prijedlog programa obilježavanja Dana Općine Stari Grad koji je trajao od 02-18.maja.

18. sjednica Općinskog vijeća

Općinsko vijeće Stari Grad na 18. sjednici usvojilo je Prijedlog Odluke o izmjenama i dopunama odluke o postavljanju firmi, reklama i drugih sadržaja na građevinama i fasadama na području općine Stari Grad. Usvojene izmjene predviđaju oštre kaznene odredbe onima koji bez odobrenja ili protivno odobrenju nadležnog organa istaknu firmu, reklamu, reklamnu vitrinu ili reklamni pano, displej, transparent, tendu, reklamnu zastavu, satelitsku antenu, klima uređaj i mural; zatim onima koji prilikom reklamiranja ističu proizvode i usluge čije reklamiranje je zakonom zabranjeno, te onima koji sve sadržaje navedene ovom Odlukom ne uklone po isteku važenja odobrenja.

Novčanom kaznom od 300 do 1000 KM kaznit će se fizičko lice ili imalac radnje, pravno lice kaznit će se novčanom kaznom od 3000 do 7000 KM, a odgovorno lice u pravnom licu novčanom kaznom od 1000 do 2000 KM.

Postojećom Odlukom o postavljanju firmi, reklama i drugih sadržaja na građevinama i fasadama i uređenju fasa-



Izmjene i dopune RP Sedrenik - lokalitet Mihrivode 3

da na području općine Stari Grad Sarajevo, utvrđeno je da inspeksijski nadzor nad provođenjem odredaba Odluke vrši urbanističko-građevinska i komunalna inspekcija, svaka u okviru Zakonom propisanih nadležnosti. Kako se u praksi pojavio povećan broj bespravno izvedenih radova regulisanih ovom Odlukom, sa tendencijom daljeg rasta istih, na prijedlog Službe za opću

upravu i inspeksijske poslove, a radi efikasnijeg i svrsishodnijeg provođenja inspeksijskog nadzora nad provođenjem Odluke, ista je dopunjena odgovarajućim kaznenim odredbama, po hitnom postupku.

Na sjednici su usvojeni i Prijedlog Odluke o usvajanju izmjena i dopuna Regulacionog plana Sedrenik-lokalitet Mihrivode 3 i Prijedlog Odluke o provođenju izmjena i dopuna Regulacionog plana Sedrenik – lokalitet Mihrivode 3.

Vijećnici su primili k znanju informaciju o izboru kandidata za dodjelu općinske stipendije nadarenim učenicima i studentima i učenicima/šegrtima iz oblasti deficitarnih zanata, za školsku/akademsku 2017/2018.godinu.



Nove prostorije MUP-a u Općini Stari Grad – sve usluge na jednom mjestu

MUP Stari Grad i Porezna uprava sada u B objektu zgrade • Prostorije otvorili ministar Mulabdić i načelnik Hadžibajrić

Općina Stari Grad adaptirala je i opremila nove prostorije i ustupila ih na korištenje MUP-u Stari Grad i Poreznoj upravi. Građani Starog Grada sada na jednom mjestu mogu zatražiti sve usluge koje pruža MUP, a to su: CIPS prijave mjesta boravka, predavanje zahtjeva za lične dokumente uz fotografisanje na licu mjesta, saobraćajne i vozačke dozvole, protokol, registracije i drugo.

Nove prostorije MUP-a Stari Grad zvanično su otvorili načelnik Općine Stari Grad Ibrahim Hadžibajrić i ministar MUP-a Kantona Sarajevo Vedran Mulabdić.

„Prije nekoliko mjeseci odlučili smo se na razdvajanje institucija koje nisu vezane za Općinu, te smo prostorije MUP-a Stari Grad i Porezne uprave odlučili preseliti u B objekat, dok su sada sve općinske službe u objektu A. Prethodno smo prostorije potpuno adaptirali i opremili, za što smo izdvojili oko 25.000 KM, te uspjeli da na jednom mjestu ponudimo građanima kompletnu uslugu MUP-a Stari Grad,“ kazao je Hadžibajrić.

„Ove prostorije imaju svu potrebnu opremu, a građanima će pružati raznovrsnu i adekvatnu uslugu. Naša intencija je kao i Općine i svih organa uprave što uspješnija i što kvalitetnija i profesionalnija usluga našim građanima jer su građani ustvari naši poslodavci. Zahvaljujem se načelniku Općine. Ovo nam je velika olakšica prvenstveno u finansijskom segmentu,“ kazao je ministar Mulabdić.

Nove prostorije u B objektu zgrade

Nihada Đulbegović, koordinatorica Sektora za administraciju MUP-a Stari Grad pojasnila je da će od sada građani, za razliku od prošlih vremena, u šalter-sali

moći dobiti više različitih usluga, za što su prije morali ići na više lokacija. „Govorim o podnošenju zahtjeva za izdavanje lične karte, prijavi i odjavi prebivališta, vađenju putnih isprava, vozačkih dozvola i ostalih pratećih usluga, poput fotografiranja i slično. Dio naših uposlenika je ove poslove radio na potpuno drugoj lokaciji – u BH Pošti na Bašćaršiji, dok smo sad ovdje svi na okupu i nadamo se da će građani biti zadovoljni našim uslugama,“ izjavila je.

Nove prostorije MUP-a Stari Grad i Porezne uprave smještene su u B objektu zgrade Općine Stari Grad. Šalter sala koja pruža usluge građanima je u prizemlju objekta (ulaz sa platoa), dok su službene prostorije na drugom spratu istog objekta.



Hadžibajrić i Mulabdić presjekli vrpcu



Uposlenici MUP-a sa ministrom Mulabdićem

Bajramske hedije za boračku populaciju



Sa podjele donacija

I ove godine Općina Stari Grad obradovala je pripadnike boračke populacije prigodnim novčanim donacijama povodom ramazanskog Bajrama. Prema riječima općinskog načelnika Ibrahima Hadžibajrića, sistemsko rješenje u znak podrške i priznavanja prava boračkoj populaciji još nije nađeno, a ovi mali znaci pažnje nešto su što se u Starom Gradu praktikuje niz godina.

“Naša tradicija podjele novčanih donacija traje skoro desetak godina i okupljamo se ovako povodom ramazanskog i Kurban Bajrama i Dana Općine Stari Grad. Ovo je zaista mali znak pažnje, sistemski rješenja od strane države nažalost nisu pronađena, a trebala su biti urađena mnogo prije, prije dvadeset godina. Sada, u 2018. godini je to možda i nemoguće ispraviti,” kazao je Hadžibajrić.

Pravo na bajramske hedije Općine Stari Grad imali su članovi porodica šehida koji su nalaze u općinskoj evidenciji, nezaposleni demobilisani borci sa evidencije Biroa za zapošljavanje Stari Grad i RVI prema spiskovima koje Općini dostavljaju boračka udruženja iz Starog Grada. Ukupno je podijeljeno 175 hedija, i to 100 šehidskim porodicama, 50 nezaposlenim RVI i 25 nezaposlenim demobilisanim borcima, a ukupni iznos podijeljenih donacija je 17.500 KM.

Emira Avdagić je iz šehidske porodice, a muž joj je poginuo u ratu. “Radim kao profesorica u Srednjoj ekonomskoj školi, majka sam dva studenta i namjeravam sa njima podijeliti ovu bajramsku hediju. Ovo je treći put da primam ovaj vid pomoći i mnogo sam zahvalna Općini Stari Grad. Pažnja ovog tipa mi prvenstveno znači kao priznanje mom rahmetli mužu, novac je simbolika u ovom slučaju,” kazala je Emira.

Projekti



Općina opremila senzornu sobu Zavoda Mjedenica

Unapređenje obrazovanja osoba sa teškoćama u razvoju ● Sensorna soba pomaže stimulaciju osjetila kao što su vid, sluh, dodir, miris i okus ● Podrška projektu za rad sa učenicima sa govorno-jezičkim poremećajima

Nastavljena je podrška Općine Stari Grad Sarajevu Javnoj ustanovi Zavod za specijalno obrazovanje i odgoj djece Mjedenica. Početkom juna otvorena je posebno opremljena senzorna soba koju će koristiti djeca sa poremećajem senzorne integracije, a čije opremanje je finansirala Općina Stari Grad. Istovremeno, potpisan je i ugovor o finansijskoj podršci projektu za podršku učenicima sa govorno-jezičkim poremećajima u osnovnim školama vrijedan 7.000 KM.

Ugovor su potpisali načelnik Općine Stari Grad Ibrahim Hadžibajrić i direktorica Zavoda Mjedenica Mirsada Čakal. Direktorica Čakal je u svom obraćanju kazala da bi dugo trajalo nabrajati sve projekte koje je Općina Stari Grad finansirala i pokrenula u korist Zavoda Mjedenica i njegovih korisnika: „Želim se beskrajno zahvaliti načelniku Hadžibajriću i njegovoj administraciji na ovom, i svim prošlim projektima, u svoje lično ime, ali i u ime uposlenika, učenika i njihovih roditelja“, kazala je direktorica Čakal.

‘Mjedenica’ mora imati podršku svih nivoa vlasti

Načelnik Ibrahim Hadžibajrić je istakao da je pomaganje ovoj instituciji obaveza: „Naša je velika obaveza pomagati Zavod Mjedenica, što ćemo zasigurno činiti i u budućnosti. Smatram da Zavod Mjedenica treba imati podršku ne samo Općine Stari Grad, već i svih drugih nivoa vlasti“, poručio je načelnik Hadžibajrić. Sensorna

Specijalna ljuljaška, ležaj, zvjezdano nebo...

Odlučili smo se za elemente, koji će nam pomoći da razvijemo ono najneophodnije kod djece. Izdvojiti ću specijalnu ljuljašku i ležaj, zvjezdano nebo, strunjače sa geometrijskim oblicima, a sve je praćeno i zvučnim efektima,“ rekla je Zumreta Jejina pedagogica Zavoda, koja je sa djecom demonstrirala sve funkcije ove prostorije.

soba je posebno opremljena soba koju će koristiti osobe koje imaju poremećaj senzorne integracije. Unutar te sobe imaju priliku da istraže i da razviju svoje senzorne vještine. Ovaj vid terapije se koristi u radu s djecom s poteškoćama u razvoju i ima veliki značaj. Sensorna soba sa različitim elementima pomaže stimulaciju osjetila kao što su vid, sluh, dodir, miris i okus.

Selmir Hadžić, uposlenik Zavoda, je jedan od začetnika ovog projekta opremanja senzorne sobe: „Senzorna soba je definitivno nešto novo, čak i za specijalizirane ustanove i ovo će zasigurno unaprijediti sistem obrazovanja za osobe sa poteškoćama u razvoju,“ izjavio je Hadžić i potvrdio da, po podacima sa kojima raspolažu, radi se možda o najopremljenijoj prostoriji ovakve vrste u regionu. Sensorna soba je opremana u tri faze, prve dvije su finansirali USAID i Federalno ministarstvo obrazovanja i nauke, a treću, odnosno najskuplju fazu u iznosu od 21.000 KM, Općina Stari Grad.

Priča sa naslovne strane

Obrazovanje

Svečano ispraćeni starogradski maturanti i ponosi generacije



Maturanti u sali Gazi Husrev-begove biblioteke

Vesela povorka starogradskih maturanata, odjeveni u plave majice sa lentama Starog Grada, s prigodnim bedževima i crvenim gerberima prodefilovala je od Sebilja do Gazi Husrev-begove biblioteke. Od 260 maturanata, njih 85 proglašeno je ponosom generacije, a uz diplome dobili su i godišnje članstvo u ovoj prestižnoj ustanovi.

Uz pozdrave maturantima i želje za uspješnim nastavkom školovanja, Jusuf Pušina, predsjedavajući Općinskog vijeća Stari Grad kazao im je da oni potvrđuju tezu koju često koristi, a to je da je BiH najljepša zemlja na svijetu i ima najbolje ljude na svijetu, a maturanti predstavljaju njenu budućnost.

„Prijateljstvo i ljubav otvaraju sva vrata ovog svijeta, a vi ste simbol znanja i intelekta BiH, zato hvala vašim roditeljima i nastavnom osoblju, što su iznjedrili jednu ovakvu generaciju. Nastavite dobrim putem, gradite i promovirate vrijednosti BiH i ponosite se što ste iz Starog Grada, najstarije i najljepše općine u gradu,“ poručio je Pušina

maturantima.

Na posljednjoj prošlogodišnjoj sjednici Općinsko vijeće Stari Grad usvojilo je Prijedlog odluke o nagrađivanju učenika završnih razreda osnovnih škola i uspostavilo priznanje „Ponos škola Općine Stari Grad“ za učenike završnih razreda osnovnih škola. Inicijator ove ideje bio je Irfan Čengić, zamjenik predsjedavajućeg Općinskog vijeća koji se također danas obratio maturantima.

„Čestitam svima na završetku osnovne škole, a posebni pozdravi i čestitke za ovih 85 učenika koji su ponos Starog Grada, ali i nose odgovornost dobrog ponašanja u budućnosti. Želim izdvojiti i pozdraviti OŠ „Vrhbosna“ jer sam tu školu i ja nekada pohađao i završio. Uskoro postajete srednjoškolci i želim da znate da ocjene i nisu toliko bitne, koliko je bitno da budete dobri i odgovorni ljudi. Za 10-ak godina će neki od vas zauzeti naša mjesta i imati uspješne karijere,“ kazao je Čengić.

Islam: Upisat ću Srednju veterinarsku školu

Jedan o maturanata koji je učestvovao u današnjem defileu je i Islam Krivić iz OŠ „Mula Mustafa Bašeskija“. „Devetogodišnje školovanje je ispunjeno mnogim usponima i padovima, a što se tiče budućnosti odlučio sam pratiti svoje srce i upisati Srednju veterinarsku školu. Ideja da se ovako skupimo svi maturanti iz Starog Grada je zaista jako lijepa. Nedostajat će mi drugovi iz škole, ali se opet radujem budućim novim prijateljstvima i izazovima u školi,“ kazao je Islam.



Defile kroz Sarače

Predstavljene puzzle Starog Grada



Besplatni setovi za osnovne škole

Slagalice sa motivima svjetskih metropola i atrakcija nešto je što postoji odavno, a zahvaljujući projektu Općine Stari Grad, sada je dostupna i slagalica koja oslikava mapu Starog Grada i njegove najvažnije znamenitosti. Jedinstveni projekat pod nazivom „Puzzle Starog Grada“ potekao je iz općinskog Sektora za lokalni razvoj, a prvi setovi su namijenjeni svim osnovnim školama iz Starog Grada, kao i JU Zavod Mjedenica. Upravo su predstavnici tih institucija i njihovi učenici prisustvovali prezentaciji ovog projekta. Načelnik Općine Stari Grad Ibrahim Hadžibajrić je kazao da je ponosan što je Općina pokrenula i realizirala ovakav jedan projekat: „Učenici više neće sastavljati samo slagalice Pariza, Londona, Rima i drugih poznatih svjetskih gradova i zemalja. Stari Grad je jedinstveno mjesto u svijetu, to je zaista „evropski Jeruzalem“ koji ima toliko za ponuditi i predstaviti svijetu“, izjavio je načelnik Hadžibajrić.

Ideja je došla od uposlenika Sektora za lokalni razvoj Općine Stari Grad. Šefica Selma Velić je izjavila da je cilj bio napraviti proizvod edukativnog karaktera, ali u isto vrijeme unikatan proizvod turističkog značaja za općinu Stari Grad, Kanton Sarajevo, ali i cijelu zemlju. Pored standardnog seta, ove puzzle su besplatno dostupne i u elektronskoj verziji preko pametnih telefona na aplikaciji „Guide2Sarajevo“: „Ovo je zapravo nadogradnja projekta kojeg smo prošle godine radili kada smo sa Udruženjem ‘Čuvari tradicije’ kreirali mobilni audio vodič Guide2Sarajevo“, kazala je Selma Velić.

Infrastruktura

Rekonstrukcija putne infrastrukture u punom jeku

Rekonstrukcija i asfaltiranje oštećenih ulica u Starom Gradu u punom je jeku, te se nastoji izvesti što veći broj planiranih radova u toku građevinske sezone. Radovi u ulicama Starog Grada nerijetko podrazumijevaju i zamjenu vodovodnih i kanalizacionih mreža koji prethode postavljanju novog asfalta. Ovi projekti jesu zahtjevniji i koštaju više nego samo asfaltiranje, ali umjesto privremenog, nude konačno rješenje stanovnicima ulica u kojima se izvode.

Safvet-bega Bašagića

Rekonstruisana je ulica Safvet-bega Bašagića na dijelu od ulice Ulomljenica pa do raskrsnice ulice Safvet-bega Bašagića i Kasima efendije Dobrače u dužini od 266 metara. Radi se o trećoj fazi radova, dok su prva i druga faza rekonstrukcije ulice urađene prošle godine na dijelu od spoja sa ulicom Alije Nametka do raskrsnice sa ulicom Pirin brijeg i od ulice Pirin brijeg do ulice Ulomljenica. Završetkom ovog dijela, ulica je u potpunosti rekonstruisana za šta je Općina Stari Grad izdvojila 430.000 kon-



Safvet-bega Bašagića



Boguševac



Čemerlina



Glođina

vertibilnih maraka.

Boguševac

Asfaltirana je ulica Boguševac od broja 55 do mosta, koja se nalazi u MZ Toka– Džeka. Novi asfalt postavljen je u ulici Boguševac na površini od oko 400 metara kvadratnih. Sanaciju ove ulice s oko 15.000 KM finansirala je Općina, a izvođač radova je bila firma KJKP "Rad".

Čemerlina

U mjesnoj zajednici Logavina rekonstruisana je ulica Čemerlina u dužini od 85 metara, te sanirani oštećeni dijelovi trotara. Projektom, čiju realizaciju je finansirala Općina iznosom od oko 29.000 KM, obuhvaćen je dio ulice Čemerlina od broja 18 do stepeništa.

Glođina

Asfaltirana je ulica Glođina u kojoj je prethodno postavljen novi separadni kanalizacioni sistem. Radovi su izvedeni na dionici od spoja ulice Čemerlina do nove fiskulturne



Čeljigovići



Franjevačka



Prvi bataljon



Bakije sokak

sale OŠ „Mula Mustafa Bašeskija“ i od sale do ulice Toromanova. Ulica je asfaltirana u dužini od oko 160 metara i širini od oko šest i po metara. Zamijenjeno je 116 metara kanalizacionih cijevi i postavljeno šest novih šaftova, te rekonstruisani postojeći priključci. Za ove radove Općina je izdvojila više od 100.000 konvertibilnih maraka.

Čeljigovići

Nakon rekonstrukcije kanalizacione mreže na dijelu ulica Hošin brijeg i Čeljigovići prošle godine, te asfaltiranje jednog dijela ulice, završeno je i asfaltiranje preostalog dijela. Ulica je rekonstruisana u ukupnoj dužini od oko 250 metara. Investiciju vrijednu oko 38.000 KM finansirala je Općina, a radove je izvodilo KJKP „Rad“.

Franjevačka

Asfaltiran je krak ulice Franjevačka - na potezu od raskrsnice sa ulicom Maguda do spoja sa ulicom Mehmeda Mujezinovica, u dužini od oko 110 metara. Ulica je asfaltirana u sklopu projekta "Jačanje uloge MZ u BIH", kojeg finansiraju vlade Švicarske i Švedske, a implementira UNDP u BiH. Stari Grad je jedna od 24 općine u BiH koja učestvuje u ovom projektu, a na osnovu odobrene aplikacije koju je pripremio Sektor za lokalni razvoj Općine Stari Grad. Radovi su koštali 22.000 konvertibilnih maraka, od čega je UNDP učestvovao sa 17.000 KM, a Općina sa 5.000 KM.

Prvi bataljon

Sanirana je i ulica Prvi bataljon na dionici od spoja sa ulicom koja vodi prema izletištu Barice do raskrsnice sa ulicom Sedrenik mali, u dužini od oko 150 metara. I ova ulica je obuhvaćena projektom "Jačanje uloge MZ u BIH", kojeg finansiraju vlade Švicarske i Švedske, a implementira UNDP u BiH. Radovi su koštali 22.000 konvertibilnih maraka, od čega je UNDP učestvovao sa 17.000 KM, a Općina sa 5.000 KM.

Bakije sokak

Stanovnici ulice Bakije sokak, na Sumbuluši, dobili su novu vodovodnu i kanalizacionu mrežu i novi asfalt. U ulici je postavljena nova separatna kanalizaciona mreža (fekalna i oborinska) u dužini od oko 80 metara, a potom i vodovodna mreža s novim kućnim priključcima. Za ovaj projekat Općina je izdvojila 134.000 konvertibilnih maraka.

Nastavlja se gradnja potpornih konstrukcija

Gradnja potpornih konstrukcija u Starom Gradu predstavlja neminovnost imajući u vidu konfiguraciju terena, kao i način gradnje privatnih objekata. Kako bi se spriječilo obrušavanje tla, štete na objektima, ali i saobraćajnicama, izgrađeni su brojni potporni zidovi. Samo od početka ove godine izgrađeno ih je desetak. U protekla tri mjeseca izgrađena su četiri potporna zida i to u ulicama: Terzibašina, Hadžijska ravan, Iza gaja i Alije Nametka. Ovi projekti koštali su više od 60.000 maraka, a finansirala ih je Općina Stari Grad.

Alije Nametka

Potporni zid u ulici Alije Nametka do broja 22 izgrađen je u dužini od 22 metra i prosječnoj visini od 3,5 metra. Gradnja ovog zida koštala je oko 25.500 KM, a izvođač radova bila je firma „Tuzlić inženjering“ iz Breze.

Iza gaja čikma

Novi armirano-betonski zid izgrađen je u ulici Iza gaja čikma u dužini od 52 metara. Izgradnju zida Općina je finansirala sa oko 28.000 KM, a radove je izvela firma „Klico trans gradnja“ iz Sarajeva.

Hadžijska ravan

U ulici Hadžijska ravan izgrađen je zid s donje strane ulice, u dužini od 38 metara. Ovaj zid je izgrađen da bi se saobraćaj u ulici bezbijeđno odvijao. Radovi su koštali oko 7.000 maraka, a izvela ih je firma „Invel“.

Terzibašina

Na Širokači je izgrađen je armirano-betonski potporni zid, u ulici Terzibašina. Radove je finansirala Općina u iznosu od 7.000 KM. Zid dužine 10 metara i prosječne visine 1,50 metra, izgradila je firma „Klico trans gradnja“.



Alije Nametka



Iza gaja čikma



Hadžijska ravan



Terzibašina

Nove ograde u Starom Gradu

Radi ugodnijeg i sigurnijeg kretanja pješaka i motornih vozila, Općina Stari Grad je finansirala ugradnju ograda na više lokacija u Starom Gradu. Radove su izvodile firme „Sacom“, „Fadž Company“ i „Sela“ d.o.o, a koštali su oko 24.000 KM.

Sedrenik

Stanovnici Sedrenika dobili su novu rukohvatnu i putnu zaštitnu ogradu u ulici Sedrenik kod broja 194. S lijeve strane ulice postavljena je rukohvatna oграда dužine 17 metara, dok je sa desne montirana putna zaštitna oграда iste dužine.

Bostarići i Za beglukom

Postavljena je putna, zaštitna oграда u ulici Bostarićima kod broja 1, dužine 25 metara, te u ulici Za beglukom dužine 110 metara.

Mezarje Alifakovac i ulica Heljevac

Dužina ograda na Alifakovcu je 52 metra. U ulici Heljevac oграда je postavljena na dužini od 31 metar, i to od broja 1 do 35 ove vratničke ulice.

Baruthana i most kod OŠ „Vrhbosna“

Dužina novog rukohvata preko puta škole u ulici Baruthana je 77 metara, dok je sa obje strane mosta postavljena oграда ukupne dužine 16 metara.



Sedrenik



Baruthana



Mezarje Alifakovac

Nove niše za otpad

Izgrađene su nove natkrivene niše za kontejnere u ulici Sarajevskih gazija do broja 21 i na Ravnim bakijama, između mezarja i ulice Sarajevskih gazija broj 54.

Obje lokacije nalaze se na Moščanici, a odlaganje otpada do sada nije bilo uređeno na ovaj način, pa su se često veće količine smeća odlagale na nepredviđena mjesta. „Betonirana su ležišta kako se kontejneri ne bi pomijerali, te postavljena metalna mreža i limeni pokrivač koji će zaštititi kontejnere od padavina i spriječiti širenje neugodnih mirisa,“ pojasnili su iz Službe za komunalne poslove Općine Stari Grad. Radove je sa oko 6.800 KM finansirala Općina, a izvođač radova je bila firma „Fadž company“ iz Sarajeva.



Bolje odlaganje otpada

Otvorena Wi-Fi mreža u jezgru Starog Grada



Besplatan wirelles

Krajem maja u Starom Gradu u rad je puštena poboljšana Wi-Fi mreža „Općina Stari Grad Free Wi-Fi“ koja pokriva prostor od Baščaršijskog trga do Katedrale, kroz ulice Sarači i Ferhadija.

To je rezultat postavljanja novih internetskih antena u blizini Katedrale i Sebilja, kojima su pojačan i poboljšan signal i brzina mreže. „Boravak stranih gostiju će sada biti itekako poboljšan, a poznato je da neka mnogo veća i poznatija turistička središta ne nude svojim gostima ovu mogućnost, već to rade ugostiteljski objekti, što se naravno plaća,“ kazali su u Službi za odnose s javnošću i informacione sisteme Općine Stari Grad koja je realizovala projekat. Dodali su da je signal i brzina vrhunske kvalitete i da može prihvatiti veliki broj korisnika u isto vrijeme. U planu je postavljanje antena i na drugim lokacijama u starogradskom jezgru.

Završene V i VI faza numeracije ulica u Starom Gradu

Petom i šestom fazom numeracije, 17 ulica u više mjesnih zajednica u Starom Gradu je dobilo nove table sa imenima i brojevima. Nove table su dobile sljedeće ulice: MZ Vratnik - Ispod grada, Elezova, Dol, Kršilovac, Džanin sokak, MZ Bistrik - Bistrik potok, Balibegovica, Namika Burazerovića, Bistrik donja čikma, Bistrik gornja čikma, Muhameda Basare (nekadašnja Muhameda Enveri Kadića), MZ Medrese - Fadil-paše Šerifovića, Hercina, Srebrenička, Žepa, MZ Širokača - Hadži Mustafe Bostarića (nekadašnji naziv Abadžin put), MZ Kovači - Hadžijamakova. Radove je izvodila firma Pismolik, a troškove je snosila Općina sa oko 9.500 KM.

Infrastruktura



Nova kaldrma na Hošinom brijegu i Grličića brdu

Obnovljena je kaldrma u ulicama Hošin brijeg basamaci i Grličića brdo. Za ova dva projekta izdvojeno je više od 100 hiljada konvertibilnih maraka. Ulicama je vraćen nekadašnji sjaj i očuvan duh tradicije.

Hošin brijeg basamaci

Urađena je rekonstrukcija kaldrme u ulici Hošin brijeg basamaci, na Hridu. Radovi u ovoj ulici podrazumijevali su rekonstrukciju kompletnog gazišta površine 400 metara kvadratnih koje je bilo prilično dotrajalo i u lošem stanju. Pored toga, postavljena je i nova oborinska odvodnja sa slivnim rešetkama, čime je riješen problem površinskih voda. Sanaciju je sa oko 95.000 konveribilnih maraka finansirala Općina Stari Grad.

Grličića brdo

Obnovljena je kaldrma u ulici Grličića brdo, na Sedreniku. Sanirano je kameno stepenište površine oko 60 metara kvadratnih. S obzirom da je ovo stepenište izuzetno frekventno i građani ga često koriste, Općina se odlučila na njegovu sanaciju. Radovi su koštali oko 11.700 KM, a finansirala ih je Općina.

Rekonstrukcija stepeništa Niže banje

Radi se rekonstrukcija stepeništa u ulici Niže banje, koje se prostire od ulice Dženetića čikma do Petrakijine. Ranije ove godine potpisan je sporazum sa Gradom Sarajevo, prema kojem ove dvije

institucije sufinansiraju radove. Rekonstrukcija stepeništa radi se kako bi mu se vratilo prvobitni izgled i funkcionalnost, s obzirom da se procjenjuje da će upotreba stepeništa uskoro – po završetku obnove zgrade Olimpijskog muzeja, biti mnogo veća, kako od strane građana, tako i brojnih turista. Stepenište će biti rekonstruirano u dužini od 40 metara i prosječnoj širini od četiri metra. Projekat košta 104.000 KM, Općina Stari Grad je izdvojila 45.000 KM, ostatak sredstava Grad Sarajevo. Izvođač radova je firma Mibral, a nadzor nad izvođenim radovima vrši firma Coning.

Novi saobraćajni znakovi u Starom Gradu

Na nekoliko lokacija u Starom Gradu postavljeni su saobraćajni znakovi i ogledala za sigurnije odvijanje saobraćaja: u ulici Alije Nametka – spoj sa ulicom Sedrenik (MZ Sedrenik), ulica Potoklinica (MZ Logavina), ulica Hulusina (MZ Bistrik), te kod parka At mejdan. Saobraćajna ogledala su postavljena u ulici Baruthana čikma (MZ Moščanica), ulica Veliki Alifakovac (MZ Babića bašča), te spoj ulica Hercina i Medrese). Radove je izveo KJKP „Rad“, a finansirala ih je Općina sa oko 2.100 KM.



Znak kod parka At mejdan

Općina i BBI banka nastavljaju pomagati privredu i zapošljavanje u Starom Gradu

Treću godinu zaredom Općina Stari Grad i Bosna Bank International d.d. Sarajevo realizuju liniju finansiranja za podsticaj u zapošljavanju i poboljšanje poslovanja u Starom Gradu.



Bukvić, Poričanin i Hadžibajrić

Ugovor o poslovnoj saradnji za 2018. potpisali su načelnik Općine Stari Grad Ibrahim Hadžibajrić i predsjednik Uprave Bosna Bank International Amer Bukvić. Ovim ugovorom definisani su uslovi i način kojim će BBI banka plasirati kratkoročna, srednjoročna i dugoročna finansiranja, uz subvencioniranje profitne marže od Općine Stari Grad, isključivo za privredna lica registrovana na području Starog Grada. Po riječima načelnika Ibrahima Hadžibajrića,

BBI banka će plasirati 1,1 milion KM

Za realizaciju ugovora BBI banka će plasirati 1,1 miliona KM dugoročnih i kratkoročnih kreditnih sredstava, a Općina Stari Grad je u Budžetu obezbijedila 25.000 KM za predviđene subvencije. Ove godine novina je da će pravo prijavljivanja za ovaj podsticaj osim firmi imati i obrtnici koji su imali završni račun za proteklu godinu. U prethodne dvije godine ukupno je odobreno 1,215.000 KM kreditnih linija za 11 privrednika sa Starog Grada, te je kroz ovaj program zaposleno 12 novih osoba.

Općina snosi gotovo čitav trošak kreditne marže: „S obzirom da je visina kreditne marže 4,49 % (za kredite sa rokom otplate do 12 mjeseci) i 5,95 % (za kredite sa rokom otplate do 60 mjeseci), a Općina pokriva 4% tog iznosa, jasno je da snosimo troškove kreditne marže u skoro cijelom kapacitetu, dok kreditna sredstva odobrava BBI banka“, kazao je načelnik Hadžibajrić. Ipak izrazio je žaljenje što interesovanje nije bilo veće, kao što se možda očekivalo.

Predsjednik Uprave BBI Banke Amer Bukvić je istakao važnost uspostavljanja veze između privatnog i javnog sektora kroz javno-privatno partnerstvo poput ovog između Općine i BBI banke: „Finansiranjem malih i srednjih preduzeća pomažemo njihovu konkurentnost na tržištu. BBI banka ovo partnerstvo ima i sa nekim drugim općinama u BiH.“

Potpisivanju je prisustvovao i korisnik ove linije u dva navrata, Mehmed Poričanin, vlasnik kompanije „Poričanin tours“ i čuvene starogradske pekare „Poričanin“, koji je podijelio svoja iskustva: „Smatram da je ova ponuda kao poklon za nekoga ko radi, a potrebna su mu novčana sredstva. Znamo kako je teško dobiti kredite od banke i kakvi su uslovi. Čuo sam za ovaj projekat Općine i BBI banke, oba moja zahtjeva su mi odobrena“, izjavio je Mehmed Poričanin.

Stipendije za nadarene učenike i studente



Podijeljeno preko 90 stipendija

Općina Stari Grad Sarajevo dodijelila je više od 90 stipendija nadarenim učenicima i studentima, kao i onima koji su odlučili izučavati deficitarne zanate.

Stipendije će im pomoći u daljem školovanju, a i sami stipendisti svjesni su da na ovaj način olakšavaju svojim roditeljima dio obaveza. „Zahvalan sam lokalnoj zajednici u podršci u školovanju u vidu stipendije. Uzevši u obzir socio-ekonomsku situaciju u našoj zemlji ova stipendija skida jedan dio tereta sa mene i mojih roditelja što se tiče finansija i pomaže mi da ostvarim što bolje rezultate u mom školovanju“, kazao je Emir Pita, student prve godine Elektrotehničkog fakulteta. On je i ranije dobijao stipendiju kao srednjoškolac zbog prosjeka 5,0 a i ubuduće namjerava održati dobar prosjek. „Nadam se da ću održati dobar prosjek i da ću u budućnosti uspjeti barem jedan dio vratiti lokalnoj zajednici koja je vjerovala u mene,“ ispričao je Pita.

Slično razmišlja i Ena Muhić, studentica druge godine Pravnog fakulteta Univerziteta u Sarajevu. „Ovo je druga godina kako dobijam stipendiju od Općine. Studiranje je jedan od najljepših perioda u mom životu. Uz pomoć stipendije uspijevam i putovati što je moja velika ljubav. Zahvaljujući stipendiji ne zavisim skroz od roditelja, što je velika pomoć i njima“, kazala je Ena koja se na Pravnom fakultetu može pohvaliti prosjekom 9,1.

Od prošle godine Općina Stari Grad stipendira i one koji izučavaju deficitarne zanate, a među njima je i Elma Demirović, učenica drugog razreda Tekstilne škole. Kaže da je jako zahvalna na stipendiji koja će joj pomoći u školovanju s obzirom na velike troškove. „Upisala sam tekstilnu školu i sretna sam što već drugu godinu zaredom dobijam stipendiju. Imam prosjek 4,0 i dobra sam učenica. Od stipendije ću sada moći i malo putovati, što inače ne bih mogla“, kazala je Elma.

Privreda

Nastavlja se podjela plastenika poljoprivrednicima u Starom Gradu

Ove godine podijeljeno sedam plastenika ● Korisnici sade paradajz, krastavce, paprike, luk ● Neke porodice preživljavaju samo zahvaljujući plasteničkoj proizvodnji

Općina Stari Grad dodijelila je ove godine sedam plastenika, površine 100 kvadratnih metara, sa dodatnom opremom, nezaposlenim demobilisanim borcima i penzionerima koji imaju prebivalište na području općine Stari Grad, a koji se bave poljoprivrednom proizvodnjom.

Za ovu namjenu iz budžeta je izdvojeno 25.000 konvertibilnih maraka. Montaža plastenika počela je u maju ove godine, a pomoćnik načelnika za privredu Općine Stari Grad Adis Hadžović sa saradnicima, obišao nekoliko porodica kojima su dodijeljeni plastenici.

Hadžović se u razgovoru s korisnicima interesovao koliko su zadovoljni kvalitetom plastenika, šta će sve proizvoditi, čime se još bave i s kakvim se sve problemima susreću.

„Zadivljen sam onim što smo vidjeli, šta sve ovi vrijedni ljudi rade da bi preživjeli i prehranili svoje porodice. Bilo mi je veliko zadovoljstvo posjetiti ove uspješne, a prije svega vrijedne ljude koji se sa zadovoljstvom bave poljoprivredom“, kazao je Hadžović.



Ove godine dodijeljeno sedam plastenika



Asija Kamber uzgaja paradajz, paprike, tikvice...

Korisnici imaju samo riječi hvale

U naselju Širokača posjetili smo vrijednu Asiju Kamber, koja je poslije agresije na Bosnu i Hercegovinu stradala od mine, ostavši bez obje noge i jedne ruke. Kako kaže njena dugogodišnja želja je bila da ima plastenik. „Nemam riječi i načina na koji bih se zahvalila načelniku Hadžibajriću i Općini što su mi dali plastenik. Meni je on kao izlet. U njemu provodim najviše vremena, tu pijem kafu i s velikom ljubavlju brinem se za svoje biljke“, priča 78-godišnja Asija, koja je u svom plasteniku posadila paradajz, papriku, krastavac, tikvice, grah, grašak i luk.

Ispod padina Trebevića u naselju Dolovi na Jarčedolima posjetili smo Atemu i Aliju Imamovića, brata i sestru koji s velikim oduševljenjem čekaju da posade svoje prve sadnice.

Alija je demobilisani borac u penziji, a poljoprivredom se uspješno bavi već godinama. „Upravo su završeni i posljednji radovi na postavljanju plastenika i

Podijeljen sadni materijal

Svi poljoprivrednici koji su od Općine Stari Grad dobili plastenike u periodu od 2013. do 2017. godine dobili su i sadni materijal. „Za 71 korisnika plastenika na području općine Stari Grad isporučeno je 14.320 komada presade. Od toga, 8.220 komada presade paradajza i 6.100 komada presade paprike“, saopćeno je iz Službe za privredu.

počinjemo sa sadnjom. Moja porodica se već godinama bavi poljoprivredom. Veliko hvala Općini i načelniku što su prepoznali naš rad“, kazao je Alija.

U istoj ulici ugostio nas je i Dijaz Šahović nezaposleni demobilisani borac i otac troje djece. „Već drugu godinu zaredom bavim se plasteničkom proizvodnjom, a do tada to nisam bio u prilici. Sadimo povrće, a imamo i dosta voća. Pored toga, imamo i ovce, koze, piliće“, priča Dijaz, koji kako kaže na taj način školuje troje djece, jer mu je i supruga nezaposlena.



U Starom Gradu održani „Dani djeteta“

Višednevni program sa sadržajima za osnovce • Tematske radionice, maskenbal, potraga za blagom • Djeca pravila zdrave napitke od voća i povrća

U srcu Starog Grada, u ulici Štrosmajerova, sredinom juna brojni mališani su se zabavili uz maskenbal, face painting, balone, maskote i igru, a time je počeo višednevni program „Dani djeteta“ koje je organizovala općinska Služba za obrazovanje, kulturu i sport.

Program u Štrosmajerovoj ulici je bio otvoren za sve mališane, ali su većinu činili starogradski prvačići, koji su posljedni dan ove školske godine, odnosno 'veseli čas' proslavili velikim maskenbalom. Vesela kolona predvođena maskotama Minnie, Mickey Mouse, Spiderman i Hulk su obišli i jedan veseli krug ulicama Zelenih beretki, Zlatarska, Ferhadija i povratak u Štrosmajerovu, a privukli su pažnju velikog broja prolaznika, ali i stranih turista. Program „Dani djeteta“ održan je povodom završetka školske godine kao i Međunarodnog Dana djeteta, koji se obilježava u junu.

'Dani djeteta' ponudili su vrlo zanimljive sadržaje. Učenci sedmih i osmih razreda OŠ "Saburina" učili su o pravima djeteta kroz forum-teatar predstavu „Heroji obrazovanja“. U predstavi je obrađena priča učenice koja se svakodnevno bori sa posljedicama koje su izazvane zbog nepravdnosti profesorice

i nedovoljnog razumijevanja od strane roditelja.

Učenci V razreda OŠ „Hamdija Kreševljaković“ u holu Velike sale Općine Stari Grad prisustvovali su radionici „Mali naučnici“, u kojoj su u praksi vidjeli različite hemijske reakcije. Demonstrator na radionici Sandra Novak iz firme „Party time bh“ je kazala da je cilj djeci postaviti tezu i ponuditi dokaz o određenim pojavama: „Sa većinom današnjih reakcija se djeca susreću svakodnevno, poput mučkanja Coca-Cole, upijanja tečnosti papirom. Mi ćemo im, na njima razumljiv način, objasniti naučnu pozadinu svake današnje reakcije“, rekla je Novak.

Osnovci učili i o zdravoj ishrani i tragali za blagom

U Centru za promociju i unapređenje zdravlja Općine Stari Grad, učenci III razreda OŠ „Edhem Mulabdić“ učestvovali su u radionici „Zdrava ishrana“. Poznati kuhar Hamid Kujraković iz Udruženja kuhara u BiH je djeci govorio o važnosti raznovrsne i kvalitetne ishrane. Također učenicima je pravio vrlo zdrave napitke od raznih vrsta voća i povrća, a u tome su mu pomagali i sami učenici.

Učenci od IV do VII razreda OŠ

„Vrhbosna“ i „Šejh Muhamed ef. Hadžijamaković“ imali su radionice za vrijeme kojih su izrađivali razne oblike od gline, a tema na Hridu je bila „Proljeće na farmi“. Njihove kolege na Mošćanici su, uz glinu, radili i sa kolažom, a tema je bila robotika.

Posebno zanimljiv je bio odlazak djece u Zemaljski muzej. Kako bi u muzeju što više vidjeli i naučili za njih je organizovana tzv „potraga za blagom“. Učestvovali su učenici OŠ "Mula Mustafa Bašeskija", ali i drugi zainteresovani osnovci koje su roditelji mogli prijaviti putem općinske FB stranice. Najuspješniji u potrazi za blagom dobili su prigodne poklone.



Sa radionice "Mali naučnici"

KK „BBY Stari Grad“ učestvovao na turniru u Italiji



Mali košarkaši u Materii

Mini basket ekspedicija Košarkaškog kluba „BBY Stari Grad“, koju su činili osnovci iz Starog Grada, krajem juna mjeseca je učestvovala na Međunarodnom mini basket turniru za mlade u italijanskom gradu Matera.

Općina Stari Grad je sufinansirala dio troškova puta ove mlade košarkaške ekipe. Uoči odlaska u Italiju, direktor KK „BBY“ Admir Sakoč je kazao da se u Materii igra jedan od najpoznatijih mini basket turnira za mlade u svijetu koji ima dugogodišnju tradiciju i ugošćava veliki broj djevojčica i dječaka iz cijeloga svijeta još od 1992. godine, a ovo je bilo 26. izdanje. Otvorenje je okupilo preko 1000 mladih košarkaša i košarkašica na ulicama Materie. Matera se nalazi na samom jugu Italije, 60-ak kilometara od lučkog grada Barija, a za 2019. godinu je proglašena evropskom prijestolnicom kulture.

U sklopu redovnog programa turnira, mlada delegacija iz našeg grada je imala prijem u Općini Bitritto, koje se nalazi u blizini Barija, gdje su načelnika Općine upoznali sa historijom i potencijalima naše starogradske općine. Podjelom medalja svim učesnicima, turnir je svečano zatvoren u subotu 23. juna.



Na otvaranju bilo preko 1000 košarkaša

Sport

Okončane fudbalska, košarkaška i stonoteniska liga Starog Grada

OŠ „Hamdija Kreševljaković“ odbranila titulu fudbalskog šampiona

Okončano je i ovogodišnje nastarije, ali i najpopularnije ligaško takmičenje osnovnih škola u Starom Gradu. Svoju premijeru doživjelo je u sezoni 2014/2015, te je ovo bilo četvrto izdanje, a prvi put se desilo da je jedna ekipa odbranila naslov. Nakon što su naslove osvojili OŠ „Edhem Mulabdić“ (2014/2015) i OŠ Šejh Muhamed ef. Hadžijamaković (2015/2016), mladim fudbalerima OŠ „Hamdija Kreševljaković“ je pošlo za rukom odbraniti prošlogodišnju osvojenu titulu. Šampioni su imali i najboljeg strijelca lige Emela Hasanovića sa 11 pogodaka i najboljeg golmana Adija Tasu.



Šampioni sa Vratnika

Uz Službu za obrazovanje, kulturu i sport, organizacija je pripala Stonotenis-kom klubu „Spin 2012“ čiji se rad odvija pod rukovodstvom Sudijske organizacije stonoteniskog saveza BiH i Amele Mujezinović, selektorice Juniorske reprezentacije BiH. Mečevi su se igrali

1	Hamdija Kreševljaković	9	8	1	0	27:5	25
2	Edhem Mulabdić	9	6	1	2	28:12	19
3	Mula Mustafa Bašeskija	9	5	1	3	18:13	16
4	Šejh M.ef.Hadžijamaković	9	2	1	5	8:21	7
5	Vrhbosna	9	1	1	6	10:28	7
6	Saburina	9	1	1	6	6:23	4

Premijerna sezona Košarkaške lige Starog Grada 2017/2018

Premijerna sezona Košarkaške lige organizovana je u saradnji sa Košarkaškim klubom BBY (Bosnian Basketball Youth). KK BBY je prošle školske godine organizovao treninge u svih šest osnovnih škola u Starom Gradu, te je zatim oformio tri košarkaške selekcije Starog Grada za kantonalno takmičenje. U martu ove godine pokrenuto je takmičenje, a mečevi su se igrali na više lokacija. Odlikovanja su podijeljena 04. maja kada je u Štrosmajerovoj ulici organizovan Festival košarke. Odlikovani su: OŠ „Vrhbosna“, OŠ „Hamdija Kreševljaković“ i OŠ „Šejh Muhamed efendija Hadžijamaković“.

Osnovci sa Mošćanice najbolji stonoteniseri

Najviše uspjeha u premijernoj sezoni Stonoteniske lige Starog Grada je imala OŠ „Vrhbosna“, koja je sastavila nepobjedivu ekipu i tako postala prvi šampion.

u OŠ „Saburina“, a ekipe su bile sastavljene od učenika i učenica. Odlikovani su: OŠ „Vrhbosna“, OŠ „Šejh Muhamed ef. Hadžijamaković“ i OŠ „Mula Mustafa Bašeskija“.



Završni turnir u Štrosmajerovoj



Mečevi se igrali u "OŠ Saburina"



Okončan projekat „Integracija u društvo kroz plivanje“

Svečanom manifestacijom na Olimpijskom bazenu „Otoka“ okončan je projekat „Integracija u društvo kroz plivanje“, zahvaljujući kome je 20 osoba sa invaliditetom iz Starog Grada naučilo osnove plivanja.

Ovaj projekat dio je velikog projekta „Regionalni projekat lokalne demokratije na Zapadnom Balkanu – ReLOaD“ kojeg finansira Evropska unija, a implementira Razvojni program Ujedinjenih nacija (UNDP). Općina Stari Grad je pristala biti dio projekta, te ga je sufinansirala sa oko 20 odsto sredstava (oko 6.000 KM). Za 20 osoba s invaliditetom iz Starog Grada je tokom četiri mjeseca bilo obezbijeđeno

besplatnih 100 časova škole plivanja na Olimpijskom bazenu „Otoka“. Također za svakog polaznika obezbijeđen je i besplatan fizioterapeutski tretman, kao i kompletna plivačka oprema (kupaći kostim, kapice i naočale). Implementator projekta je bio Plivački klub „Spid“.

Medalje, diplome i poklone svim polaznicima časova plivanja uručio je načelnik Općine Stari Grad Ibrahim Hadžibajrić, koji je u svom obraćanju čestitao svima na uspješnoj implementaciji projekta, a izrazio je zadovoljstvo što je Općina Stari Grad bila dio ove uspješne priče, te obećao da je isto u planu i naredne godine.

Održan 16. karate kup “Stari Grad Open 2018”

U sportskoj dvorani Ramiz Salčin u Sarajevu održan je 16. karate kup “Stari Grad Open 2018”, još jedno takmičenje koje organizatori tradicionalno organizuju povodom Dana Općine Stari Grad. Turnir je u ime Općine Stari Grad otvorio

zamjenik predsjedavajućeg Općinskog vijeća Stari Grad Irfan Čengić. Učešće je uzelo 220 takmičara iz 21 kluba iz regiona. Najuspješniji klubovi bili su: KK „Bjelopoljac“ iz Mostara osvojivši četiri zlatne, devet srebrenih i devet bronzanih medalja, potom KK „Novi Grad Sarajevo“ čiji su karatisti osam puta bili na najvišem pobjedničkom postolju, uz dva srebra i 4 bronzane. Na trećem mjestu je KK “Master Sarajevo” sa pet zlatnih medalja, tri srebrne i šest bronzanih. Najuspješniji takmičar je Haris Gaši, član Kbs Samuraj Brčko, a najuspješnija takmičarka je njegova klupska kolegica Robertina Mandić. Sportski karate klub “Stari Grad” osvojio je dvije srebrne i četiri bronzane medalje.



Učestvovalo 220 takmičara

Nova sportska oprema za školu na Bistriku



Novi golovi, koševi, mreža...

Golovi za mali nogomet, mreža za odbojku i pokretni koševi postavljeni su u školsko dvorište podružne OŠ „Edhem Mulabdić“ u ulici Bistrik, čime je učenicima ove škole konačno omogućeno da kvalitetnije i zdravije provode, kako nastavne, tako i van-nastavne aktivnosti.

Ova sportska oprema obezbijeđena je posredstvom projektnog prijedloga kojeg je pripremio Sektor za lokalni razvoj. Općina Stari Grad je u saradnji s Fudbalskim klubom „Bistrik“ s projektnim prijedlogom nabavke sportske opreme aplicirala prema Federalnom ministarstvu kulture i sporta. Federalno ministarstvo projekat je podržalo s 5.000 KM, od čega su nabavljena dva nova gola za mali nogomet, mreža za odbojku, te dva pokretna koša.

Podsjećamo, prošle godine izgrađena je nova sportska površina, dimenzija 20x10 metara, za šta je Općina izdvojila oko 40.000 KM. Pored toga, Općina je finansirala i radove asfaltiranja školskog dvorišta ispred Osnovne škole „Edhem Mulabdić“ na Bistriku za šta je utrošeno oko 29.000 KM.

Gradi se sportski teren na Mihrivodama

U toku izgradnja sportskog terena Bijela bašča u starogradskom naselju Mihrivode. Planirano je da prostor bude multifunkcionalan. Bit će iscrtan teren i za mali nogomet i za košarku, te postavljena dva gola sa svom pripadajućom opremom i dva koša.

Postavit će se zaštitna ograda oko cijelog igrališta visine šest metara. Na ogradu će biti postavljeni reflektori, tako da će igralište biti osvijetljeno i u večernjim satima. Planirano je i postavljanje tribina, korpi za otpatke, te izgradnja parkinga.

Ukupna vrijednost projekta je oko 130.000 KM. Na osnovu projektnog prijedloga kojeg je pripremio Sektor za lokalni razvoj za izgradnju sportskog terena Bijela bašča obezbijeđeno je 80% sredstava od ukupne vrijednosti projekta od donatora. Istanbulska Općina Fatih će izgradnju sportskog terena finansirati sa 86.350 KM, Federalno ministarstvo kulture i sporta sa 17.000 KM, a Općina Stari Grad projekat će sufinansirati sa 26.370 KM. Rok za izvođenje radova je 45 dana, a izvođač radova je firma „Bosman“.

Predstavljamo

Mirvad Zenuni – paraglajder iz Starog Grada koji je letio cijelim svijetom

Ukoliko letite u skladu sa pravilima, šanse da se desi nesreća su ravne nuli • Let od Jahorine do Kaknja • Takmičenja širom svijeta

Jedrenjem padobranom, odnosno paraglajdingom, Mirvad Zenuni se bavi već 15 godina. Ovaj sport je do nedavno bio velika nepoznanica u našoj zemlji i okruženju, ali se posljednjih godina počeo intenzivno razvijati, širiti i sada sve više uzima maha u sportskom vazduhoplovstvu. Na opaske da se bavi ekstremnim, opasnim sportom i da često izaziva sudbinu, Mirvad odgovara da je svaki sport opasan onoliko koliko ga osoba učini opasnim: „Ovo pravilo važi i za paraglajding, jer ako koristite kvalitetnu i certificiranu opremu, letite u bezbjednim vremenskim uslovima, poštujete pravila, šanse da nešto pođe po zlu su ravne nuli“, uvjerava Mirvad.

Let od Trebevića do Srbije

Mirvad je nedavno sa svojim padobranom poletio sa Trebevića, a svoj let je okončao 120 kilometara zračne linije dalje u mjestu Tubići, koje se nalazi u okolini Užica: „Sletio sam ljudima u dvorište kuće, oni su me onda ugostili i proveli smo neko vrijeme zajedno“.

Lista sportova kojim se bavio Mirvad je velika: ronjenje, snowboarding, moto trke, padobranstvo: „Kada sam počeo sa paraglajdingom to je bila tačka na sve prijašnje sportove, letenje na taj način mi je jednostavno postalo način života“, kazao je Mirvad i otkrio da mu je prvi let bio na planini Bjelašnici. Za Mirvada svaki let je poseban i nijedan nije isti: „Mnogi kažu prvi let je najbolji, ali to za mene apsolutno ne važi, jer uživam u svakom



Petnaest godina letačkog iskustva



Let iznad Starog Grada

novom letu i teško da mogu zamisliti par dana, a da ne poletim“.

Od regiona, Turske, pa sve do dalekog Meksika i Brazila

Lokacije na kojima je Mirvad Zenuni letio su zaista brojne: „U mojih 15 godina letačkog iskustva sam koristio svaku moguću priliku i stabilno vrijeme da poletim, i zbog toga iza sebe imam tako veliki broj letova“. Ovaj nevjerojatni paraglajding pilot izdvaja nekoliko preleta: „Jedne prilike sam letio od Vareša do Tuzle, pa nazad do Olova. Također, poletio sam jednom sa Jahorine i sletio u Kakanj, a tu je i let od Mrkovića do Zenice, i naravno mnoštvo letova u inostranstvu“. Mirvad i njegov tim svake godine idu na vrlo poznatu letačku lokaciju na plaži Oludeniz na jugozapadu Turske, a izdvojio nam je i šestosatni noćni let u Brazilu, te let u Meksiku. U regionu ima mnoštvo odličnih lokacija gdje re-

dovno ide i učestvuje na takmičenjima, a nerijetko uzima i odličja: „Ovo ljeto me očekuju takmičenja u Nišu, Vršcu, Portu i Kruševu. Potom ću u Sarajevu ugostiti predstavnike najpoznatije agencije za organizaciju paraglajding tura u svijetu. Oni dolaze iz Švicarske i nadam se da će našu zemlju i grad uvrstiti u svoju redovnu ponudu“, Mirvadova su očekivanja.

„Sarajevo Open Air 2018“ i poruka za početnike

Mirvad za kraj avgusta najavljuje takmičenje na Bjelašnici „Sarajevo Open Air 2018“: „Organizujemo državno takmičenje u preciznom slijetanju i smatramo ga jako interesantnim za gledatelje i medije. Ova vrsta takmičenja na najbolji mogući način pokazuje veliku količinu bezbjednosti našeg sporta. Prisutni će se moći uvjeriti u mirnoću i preciznost slijetanja, a takmičit će se letači svih generacija iz naše zemlje i regiona“. Ovaj iskusni letač na kraju našeg razgovora poručuje da se za početak niko ne usudi letjeti sam: „Obavezno se javite u lokalni klub koji se bavi obukom, a ima ih nekoliko u našoj zemlji, za regiju Sarajeva to je Extreme Sport Sarajevo. Bitno je i da pilot ima iskustvo školovanja početnika, i nikada ne nabavljajte samostalno polovnu opremu preko interneta“, kazao je na kraju letač sa Jarčedola Mirvad Zenuni.



Nenadan susret u Tubićima

Staro Sarajevo

Piše: **Rasim Ibrović**

Stećci u Donjim Moćiocima

Na prostoru općine Stari Grad nalaze se dvije nekropole stećaka. Jedna od njih je široj javnosti relativno poznata, a to je ona na Faletićima. Dočim, druga, gotovo da je nepoznata, mada je mnogo bogatija od prve. Riječ je o nekropoli u selu *Donji Moćioći*, na lokalitetu poznatom kao *Grčko greblje*. Upravo zbog tog nevelikog znanja o navedenoj nekropoli mi ćemo u ovom broju *Starogradskih habera* kazati riječ-dvije o njoj. Ali, prije kazivanja o nekropoli u *Donjim Moćiocima*, kažimo nekoliko općih naznaka o stećcima.

Stećak – srednjovjekovni bosanski nadgrobni spomenik



Na pitanje šta je stećak moguće je odgovoriti na sljedeći način: Stećak je naziv koji se javlja u literaturi tokom XIX st. za sve srednjovjekovne bosanske nadgrobne spomenike. Izvorni, ili autentični nazivi tih nadgrobnjaka jesu: *zlamen, bilig, kam, mramor, kuća i vječni dom*. Također, u narodnom predanju prisutni su i sljedeći nazivi: *grčko, mađarsko, kaurško, rimačko i čifutsko greblje, zatim mašet...* Najbolji poznavalac stećaka **Šefik Bešliagić** (1908-1990.) navodi da se pod uticajem historiografske literature, od XIX st. počinje u narodu javljati i sve više širiti termin stećak, posebno kod obrazovanog i gradskog stanovništva, te naglašava da nikada i nigdje nije čuo da narod kaže *bogumilski spomenici*.

Na pitanje čiji su stećci ili kome su oni pripadali mogući odgovor je sljedeći: Riječ je o nadgrobnim spomenicima koji se kao takvi koriste tokom srednjovjekovne bosanske države (*banovine i kraljevine*), a pod njima su pokapani svi stanovnici

(*pod uslovom da su im materijalne mogućnosti to dozvoljavale*), bez obzira kojoj religiozno-konfesionalnoj zajednici pripadali, a poznato je da je Bosna i tada, u srednjem vijeku, baš kao i danas bila pluralna u religijskom smislu. Tu pluralnost činile su tri konfesionalne zajednice, a to su: *rimokatolici, krstjani Crkve bosanske i pravoslavci*. Dakle, stećak je interkonfesionalni, srednjovjekovni bosanski nadgrobni spomenik!

Iz ova dva kratka i posve taksativna kazivanja vidno je da su stećci bosansko, prvorazredno kulturno-historijsko naslijeđe koje danas pripada svim žiteljima Bosne, bez obzira kojem religijskom i etničkom identitetu pri-

i sljemenjacima ili sarkofazima. Među njima se posebno ističu oni stećci koji imaju duplo postolje, zatim oni koji imaju oblik dvojnog groba (*dvostruki sanduk*) i naravno oni koji imaju ikonografski sadržaj (*reljef*). Ikonografski motivi su sljedeći: polumjesec, rozeta, jabuka, mač, stilizovani križ „svastika“, predstave psa i ljudska (*viteška*) ruka u oklopu. Morfološkom i ikonološkom analizom stećaka u *Donjim Moćiocima* možemo zaključiti da je riječ o nekropoli u kojoj su ukapani pripadnici šire društvene zajednice koja je živjela na dotičnom prostoru. Osnovni razlog tog zaključka je taj što su zajedno stacionirani stećci velikaša (*recimo stećak nemalih dimenzija s oklopljenom viteškom rukom*), ali i oni manji stećci bez ikakvog ikonografskog sadržaja. Ta činjenica nam ukazuje i na moguću dataciju stećaka, a to je ono vrijeme kada još u bosanskoj državi nije došlo do snažnog diferenciranja u društvu, između bogatih i manje bogatih članova zajednice – vrijeme rodovskog društva u kojem još nisu izdvojene bogate i moćne porodične zajednice. Sve navedeno ukazuje da nekropola u *Donjim Moćiocima* datira iz XIV st.

Na kraju kažimo da do nekropole u *Donjim Moćiocima* možemo doći preko Nahoreva ili preko Barica i Čavljaka, a koji god put da odaberemo zateći ćemo prirodni ambijent izrazito dinamičnog reljefa, bogate vegetacije posebno u kasnim proljetnim i ranim ljetnim danima. Sam lokalitet nekropole pruža prelijep pogled na okolna bosanska brda i planine. Svježina zraka i planinski vjetrovi koji stoljećima miluju stećke u *Donjim Moćiocima* idealni su za odmor i meditaciju.

Nekropola stećaka – Donji Moćioći

Nekropola stećaka u selu *Donji Moćioći* (*sedam km zračne linije sjeverno od centra Sarajeva*), preciznije na lokalitetu *Grčko greblje*, 2008. godine proglašena je nacionalnim spomenikom BiH. Selo *Donji Moćioći*, u vremenu srednjovjekovne Bosne pripadalo je župi Vrhbosni, odnosno većem teritoriju kojeg je držao rod Pavlovića. Ova nekropola ima preko 60 stećaka koji po svom obliku pripadaju položenim monolitima i to sanducima



Ukrašen harem Careve i Gazi Husrev- begove džamije

Općina Stari Grad je povodom Ramazana, najsvetijeg mjeseca islamskog lunarnog kalendara, raznovrsnim cvijećem ukasila harem Careve džamije u Sarajevu. O istoj ideji razgovarano je i s predstavnicima Gazi Husrev-begove džamije koji su ukazali na problem s reflektorima koji su donedavno bili u funkciji i osvjetljavali kako džamiju tako i Sahat kulu. Iz tog razloga u ovoj džamiji je postavljeno deset novih reflektora sa najsavremenijom LED rasvjetom, devet je finansirala Općina, dok je deseti bio gratis od izvođača radova firme Step d.d. Sarajevo.

